

河間縣志卷之六

藝文志

箕尾之墟雲漢爲章代有作者大文煌煌爾今
茹古嚼羽含商同工異曲金石笙簧積玉立圃
孰非夜光縱橫上下示我津梁志藝文第十
撰著

言撰著於河間必自獻王始漢武帝罔求遺失
諸子傳說皆充秘府而獻王得書多與漢朝等
其對三雍宮及詔策所問三十餘事班史稱之
魏隋而降代有作者然卷帙多散佚其名僅存

近者或繁浩不勝載因條次篇目列於藝文首
庶不令仰屋著書者嘆勞苦神思訖於無傳也

河間周制十八篇

對上下三雍宮三篇

右河間獻王德撰

毛詩二十九卷

隋藝文志
載二十卷

右漢博士毛萇撰

器準三卷

樂書九卷

遁甲經二卷

四術周髀宗

靈憲歷

右北齊參軍信都芳著

剛德傳三十卷

諸劉譜三十卷

四聲指歸一卷

右隋太子舍人劉善經著

論語述議十卷

春秋攻昧十五卷

五經正名十二卷

孝經述議五卷

春秋述議四十卷

註詩序一卷

算術一卷

右隋太學博士劉炫著

穎陽書三篇

右唐邢和璞著

隋州集十卷

右唐隨州刺史劉文房著

嘉善集五十卷

名臣事迹五卷

右宋吏部尚書陳國公張昭著昭有史材其奉
敕撰修唐史歷朝實錄及制旨兵法等卷數詳
本傳

瀛海殘編十卷

右宋叅知政事權邦彥著

運氣要論

宣明論

原病式

習醫要論直格書

素問玄機

右金高尚先生劉完素著金趙秉文常爲完素
敘所解素問謂思理精詣洞究微妙唐王冰上
僕後一人而已

鳩巢漫稿

雲南志

右元雲南宣慰使李京景山著虞集元明善爲
之敘

貞祐記聞

右元河間郝偁子榮著

河間府志二十八卷

諫垣奏議

連漪亭稿

樊氏族譜

防邊議

籌荒錄

禦戎論

語畧

讞獄記

西田文集

右明兵部侍郎樊深著

晉中草

杜律評解

右明陽信令張光紀著自爲序

易經約說

四書易解

石明光祿寺署丞馮勗著

詩經簡正錄

刑部侍郎提橋著

易經抄訓

四書抄訓

道學真傳

玉堂制草

銀臺日錄

靜安齋詩文

左都御史左敬祖著

愛竹軒稿

臨洮副使孫際昌著

盤山詩稿

滇南使草

江西使草

翰林院編修戈濤著

文

六經之文美矣富矣其於體也無所不備故爲賦頌歌讚爲論說爲辭序爲章奏爲紀傳及箴誄銘檄百家騰躍範圍不是過也是雖盛衰隨時要以貫道爲宗主茲所輯河間古文若干首多閑雅可觀間有未合規度者以其有關政治勿忍棄遺自兩漢迄今以時代次不名一體覽者可以識升降之原矣古人云言觀麗則永監淫費士君子寢食于茲尚期進于古之立言者哉

道書四則

漢河間獻王德

湯稱學聖王之道者譬如日焉靜居獨思譬如火焉
夫捨學聖王之道者捨日之光何乃獨思若火之明
也可以見小耳未可用大知惟學問可以廣明德慧
也

堯存心於天下加志於窮民痛萬姓之罹罪憂衆生
之不遂也有一民饑則曰此我饑之也有一人寒則
曰此我寒之也一民有罪則曰此我陷之也仁昭而
義立德博而化廣故不賞而民勸不罰而民治先恕
而後教是堯道也當舜之時有苗不服其所以不服

者大山在其南殿山在其北左洞庭之波右彭蠡之川因此險也所以不服禹欲伐之舜不許曰諭教猶未竭也寃諭教焉而有苗氏請服天下聞之皆非禹之義而歸舜之德

禹稱民無食則我不能使也功成而不利於人則我不能勸也故疏河以導之鑿江通於九派濶五湖而定東海民亦勞矣然而不怨苦者利歸於民也

管子稱倉廩實知禮節衣食足知榮辱夫農者國家所以昌熾士女所以姣好禮義所以行而人心所以安也尚書五福以富爲始子貢問爲政孔子曰富之

既富乃教之也此治國之本也

河間獻王贊

漢班固

昔魯哀公有言寡人生於深宮之中長於婦人之手
未嘗知憂未嘗知懼信哉斯言也雖欲不危亡不可
得已是故古人以晏安爲鳩毒無德而富貴謂之不
幸漢諸侯王以百數率多驕淫失道何則沉溺放恣
之中居使然也夫惟大雅卓爾不羣河間獻王近之
矣

河間相張平子碑

漢崔瑗

張君南陽西鄂人諱衡字平子其先出自張老爲晉

大夫納規趙氏而反其侈書傳美之君天資睿哲敏
而好學是以道德漫流文章雲浮數書窮天地制作
侔造化瓌辭麗說奇技偉藝磊落渙汗與神合爽然
體性溫良聲氣芬芳仁愛篤密與世無傷可謂淑人
君子矣初舉孝廉爲尚書侍郎遷太史令實掌重黎
歷紀之度亦能燁耀敦大天明地德光昭雲漢遷居
司馬令侍中遂相河間政以禮成民用是息遭命不
永聞焉遷徂朝失良臣民隕令君天泯斯道世喪斯
文凡百君子靡不傷焉乃爲斯表以旌厥門其辭曰
旌爾張君資質懿豐德茂才美高朗顯融亦何不師

焉所不學盈科而進成章乃達一物不知實以爲恥
聞一善言不堪其喜包羅品彙稟受無形酌焉不竭
冲而復盈凜凜其度亶亶其幾膺數命世紹聖作師
苟華必寔令德惟恭柔嘉維則孝友祇容凡出在茲
惟帝念功往哉汝諧化洽民雖愍而不弔降此咎凶
哲人其萎罔不時惻紀於銘勒永終譽兮死而不朽
芳烈著兮

論河間起解犢館

漢呂強

陛下龍飛卽位雖從藩國然旣處九天之高豈宜有
顧戀之意且河間疏遠解犢邈絕而當役勞民必漏

訛言之間至戚發憤方啟專奪之隙斯忠賢所以智
屈社稷故其爲殲易曰履霜堅冰至云所從來久矣
今跡其所以亦豈一朝一夕哉

論水患疏

時瀛冀諸州連歲大水故楷上奏

北魏崔楷

臣聞有國有家者莫不以萬姓爲心故矜傷軫於造
次求瘼結於寢興黎民阻饑唐堯致嘆衆庶斯饑帝
乙罰已良以爲政與農實繫民命水旱緣茲以得濟
夷險用此而獲安頃東北數州頻年淫雨長河激浪
波洪汨流川陸連濤原隰通望彌漫不已汎濫爲災
口無擔石之儲家有藜藿之色華壤膏腴變爲鳥鹵

菽麥禾黍化作萑蒲斯用痛心徘徊潸然佇立也昔
洪水爲害四載疏於夏書九土旣平攸同紀自虞誥
亮由君之勤恤臣用劬勞日昃忘餐宵分廢寢伏惟
皇魏道敷九有德被八荒槐階棘路寔維英哲虎門
麟閣寔曰賢明天地函和日月光曜自比定冀水潦
無歲不饑幽瀛川河頻年汎溢豈是陽九辰會百六
鍾期故以人事而然非爲運極昔魏國鹹陽史起晒
之茲地荒蕪臣實爲恥不揆愚瞽輒敢陳之計水之
湊下浸潤無間九河通塞屢有變改不可一準古法
皆循舊隄何者河決瓠子梁楚幾危宣防旣建水還

舊跡十數年間戶口豐衍又決屯氏兩川分流東北數郡之地僅得支存及下決靈鳴水由一路往昔膏腴十分病九邑居凋離墳井毀滅良由水大渠狹更不開瀉衆流壅塞之所致也若穿鑿坎澮分立隄竭所在疏通令無停蹙隨其高下必得地形土木叅功務從便省使地有金隄之堅水有非常之備鈎連相注多置水口從河入海遠邇逕過瀉其澆鹵泄此陂澤九月農罷量役計功十月昏正立匠表度縣遣能工摩畫形勢郡發明使籌察可否審地推岸辨其脈流樹版分岸練厥從往別使案檢分割是非暇睎川

原明審通塞當境修治不勞役遠終春自罷未須久
功卽以高下營田因於水陸水種秔稻陸藝桑麻必
使室有久儲門餘豐積其實上葉禦災之方亦爲中
古井田之利其於近事有可比倫江淮之南地勢渚
下雲雨淫霖動彌旬月邇途遠運惟用舟艫南畝畚
耑微事耒耜而衆庶未爲饑色黔首罕有饑顏豈天
德不均致此偏罰故是地勢異圖有茲豐饒臣旣鄉
居水際目覩荒殘夙宵不寐實希効力事得施行

北周王通墓誌銘

公諱通其先太原人也粵乃仙嶽含靈毓禎圖而錫